

Helbestvanên me yên nûjen, nizandin helbestên klasîk binîvisîn



Di bawerîya min de helbestvanê ku zanînek berfireh û serboriyên dûr û dirêj li ba wî nebin, ew ne helbestvane û nikare ti tîkiliyan bi helbestê re ava bike. Tev nivîs an helbestên ku mirov dinivîsîne ji encamên ked, west, serborî û cefaya ku ew mirov tê de dijî û wiha ew mirov bê kêfa xwe, bê dilê xwe, bê pîlan û ji neçarî çend gotinên kurt û bi wate ji hinavê xwe dertîne ser kaxetê, da ku xwe rehet bike û bêhna xwe derxîne. Ew çend gotin Helbest e. Ango wek pîreka ducanî, dema ku dizê, bê çendî bêhna wê derdikeve. Mirovê helbestvan jî wiha ye. Bi gotinek din ez dikarim bibêjim ku nivîsandina helbestê qedere. Di wiha qeder de tîkiliya helbestvan bi helbestê re dest pê dike.

Belê giringiya helbesta astbilind eve ku, helbestvan karibe wê helbestê bi êş û janên xwe an kêf û şahiya xwe, nexweşî û şaşiyên civata xwe an

Konê Reş

serketin şahiyên miletê xwe bihûne. Ji ber ku yê helbestvan nefereke ji civatê û ji gelek neferan hisê wî bilindtîre, vêca pêwîste ew berî mirovên normal bi şadiyên xwe û welatîyên xwe re bikene, bi êş û janên xwe û welatîyên xwe re şînê bikşîne. Di wê şîn û şadiyê de mirovê helbestvan dest bi hunandina helbestekê dike, û wiha têkilî di navbera helbestvan û helbestê de dest pê dibe.

Bi rengekî din; dema ku di zivistanî de baran nebare, di buharî de çûk û çivîk nexwînin, feqîr û xizan bê nan bin, ji êş û kulan merisî bin. Dema ku mirov di welatê xwe de xerîb be, di bin zîlm û zora neyaran de dîl be, zimanê dê qedexê be, gotina rast qaçax be... Hingê têkiliya yê ku rast û durîst helbestvan be, bi hunandina helbestekê dest pê dike û hinavê xwe ji kul, xem û janan vala dike.

Li dor têkiliya helbestvan bi desthilatê ve, ez ne bawerim ku pênuşek azad heye û ew pênuş ne di bin siya sansorê an terorê de ye. Nexasim di welatên cîhana sisyan de. Di van welatan de sansor rola xwe dilîze, ji ber alozî û gengeşeyên azadî û demokratîyê, û sansora

ku heye polîtîkî ye bêtir ji civakî... Ji ber ku desthilatên welatên cîhana sisyan ji nivîskaran bi tirs in, her dem û gav sawa nivîskaran di dilê wan de ye. Vêca sansora rêjîmên wan welatan rola xwe dilîze û şert û mercê xwe ferz dike. Ji ber wiha rewş, nivîskar bêçar e di bin siya terorê de dijîn û pirê caran ji bêçarebûn sansoreke kesayetî (zatî) li ser xwe û berhemên xwe datînin, da ku berehmên xwe ji sansorê biparêzin û derbas kin..!

Di baweriya min de, ev sansora zatî ku nivîskar li ser ramanên xwe datîne, ji sansorê desthilatan xerabtîre.. Ji ber ku, heger sansora desthilatê perçeyekî ji nivîsandina nivîskarekî ku azad be, di nivîsandina xwe de, xetsor bike, nivîskar bi sansora xwe ya kesayetî (zatî) nivîsandina xwe tevî xetsor dike.

Nivîskarê azad, ew nivîskarê ku di hizr û ramanên xwe de zelal be, di nivîsandinên helbestên xwe de rastgo û mêr be, li navdariya, li ser piştî çend qedexeyên civakî negere..wek: erêkirina li ser olê û hetîketiya bedena jinê.

Helbesta cîgirtî ewa ku li desthilatê nasekine, bi

wêrebûn şaşî û xerabiyên civatê eşkere dike. Ew şaşî û xerabiyên ku civat ji ber bendora wan paşketî maye..

Heger helbestvan mêr be, wê di nivîsandinên xwe de şerê wan şaşî û xerabiyên civatê bike, bê ku sansorê li ser xwe û berhemên xwe deyne. Gereke wan şaşiyên ji cemawere raxîne ber çavan, da ku cemawer di ser wan şaşiyên re biqevêze, li pişt xwe bihêle û hin bi hin ber bi xêr, xweşî û avakirinê re here..

Li dor beşê sisyan ji pirsê: Helbest di roja me ya îro de li kû maye?

Di vî warî de, em dibînin ku çapkirina dîwanên helbestan zoriya coreyên torevanî yên mayî biriyê, wek: çîrok, şano û roman...

Heger em stastîkekê di vî warî de çêbikin, emê bibînin ku pileya weşandina dîwanên helbestan bilindtîre ji coreyên torevaniyên din û ji yên zargotinî.

Gelo sedem çine?

Heger em bersivê bidin, dibe ku gelek dilê xwe bigrin... belê ta ku rastî neyê gotin, pêşketin rêka xwe di nav me de nabîne û em di pêvajoya xwe ya torevanî de rast û durist nalivin...

Me gotî cihê dîwanên helbestan bi gelekî berztîre ji coreyên mayî, lê gelo raste ew

dîwanên helbestane û xwediyan wan raste helbestvanin?!

Bê goman helbestvan di nav wan de peyda dibin û têvelin gava ku em wî nifşê pêşîn ji vê mijarê xwe bidin alî, ew nifşê ku ji mêj ve bi rengê Cizîrî, Xanî û Cegerxwîn dinivîsînin yên ku em dixwazin li dor wan rawestin, ew nifşê ku doh fêrî alfebaya kurdî latînî bûne û îro dîwanên helbestan çap û belav kirine, bê ku helbestên dîwanên wan şert û mercên dîwanên helbestan hilgirin.

Gotineke Apo Osman Sebrî heye, dibêje: *"gelek ji xortên me çavên xwe berdana nivîsandina helbestan ne tiştêkî hêjaye, di vê nivîsên rasteser bihên nivîsîn. Belê helbest tiştêkî ji edebê ye, lê netewaya edebê ye. Divê ku mirov zanibe, bi zimanê xwe binivîsîne, lê nizamî, hema ji min re helbestan çêdikin... ji kovara Pêşeng hejmar 5/1984"*.

Em jî bi gotina rehmetiyê Apo Osman Sebrî re; lê em ne bi wan kesên ku navê nûjeniyê bihîstine, piraniya helbestên wan bi wî rengê nûjen hatiye nivîsandin, ew rengê ku xwendevan tê nagihêje û li ber nekeve.

Helbestvanên me yên nûjen, nizanin helbestên kilasîk binivîsînin, dibêjin: em helbestên nûjen datînin, mane

nûjenî pêşketina kilasîke, û nûjeniya ku ne ji kilasîk hatibe derê, diyare ew nûjenî bîjiye, bê esle, û em li toreya resen digerin, toreyaya ku kok û rehên wê di nav xaka me de kûr çûbe.

Ji rexeke din ve em bibêjin nebêjin rewşenbîriya ku bi me re kom bûye, ji zimanê Erebi ye, bi saya zimanê Erebi jî em serwxtî rewşenbîriya cîhanî bûn. Heger mirovek ji helbestvanekî ji terzê nûjen bipirse û daxwaza navê sê helbestvanên Erebi yê hevçerx bike, bê guman piraniya wan nizanin, ji ber ku naxwînin, bi tenê navên çend kesên bi nav û deng bihîstine, wek Edonîs, Mehmûd Derwîş û Nîzar Qebanî û Beyatî... Ev navên ku pîrka min jî bihîstine, gerek mirovê rewşenbîr nemaze torevan, bi tevgera rewşenbîriya xwe re be, ew

welatê ku tê de dijî, heger helbestvan be, gerek helbestvanên hevçerxê xwe nas bike û helbestên wan bixwînin û weha jî kesên ku çîrok, şano, romanê dinîvîsînin.

Ji bilî ku tûrikê xwe bi gotin, metelok û çîrokên folklorî dagrin, nexasim ji pîrejin û kalemêran, da ku samanên xwe dewlemend bikin ji gotinên kurdî yê resen û dawî û pêşî xwendin, bi çî zimanî be bera ew ziman be û wek ku hatiye gotin: "sê heyvan bixwîne, ku tu sê rojan binîvîsîne, da ku tu sê rûpelan dagire". Hema bese kak Mesûd Xelef û bi kurt kurmacî; helbest kurdî di roja îro de, di navbera kilasîk û nûjeniyê de li ber xwe dide... Ez ji wilo bêtir zêde nakim, spas ji te re.

